

15. august 2025

UKA 2025/155

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Sineriak tamakkerlugu oqaluffeqarnikkut aserfallassimanermut takussutissamik iluarsartuussinissamullu pilersaarusiortoqarsinnaanera pillugu Naalakkersuisut UKA2026 nallertinnagu agguassassamik nalunaarusioqqullugit aalajangiiffigisassatut siunnersuut.

(Inatsisartunut ilaasortaq Knud Kleemann, Atassut)

Tunngavilersuut:

Sineriapput assigiinneqaaq, anersaakkullu tarnikkullu peqqissuuneq eqqartorneqartuarpoq, tassanilu inupparujussuarnut sinerissatsinni anersaakkut nukittunerunissamut patsiaalluartut ilagaat oqaluffeqarnerput.

Upperisarsiorneq ukiorpanngortuni inuusunnerusut illoqarfiillu annerusut akorngini malunnartumik soqutigineerukkiartorpoq immaqalu allaat soqutaanngitsutut puigorneqartuartutullu inissisimajualersimalluni, tamannalu aamma atuuppoq inatsisartuni sulinermi, ilageeqarneq puigorneqarlunnartartoq nassuerutigisariaqarparput.

Sineriassuatsinni lutherikkutut upperisaqarnermik perorsagaanermi pigaartitsisorpassuaqarpoq, ulluinnarnilu inuunermi upperneq inuppassuarnuttaaq ilaalluinnarluni.

Oqartarpugut inoqatigut nukittuujussasut sutigut tamatigut, imminnullu upperinerullutik pinissaattaaq siunertariuarterlutigu, tassani aamma anersaakkut nukittuujunissaq atuussinnaasariaqartoq isumaqarpugut.

Pisariaqartuutipparpullu maanna sinerissatsinni oqaluuffit eqqarsaatigalugit iluarsartuussisinnaanermut naalakkersuinikkut pilersaarummik erseqqissumik peqartoqartariaqartoq.

Sumiiffippassuarnimi oqaluffiit assut pisoqaapput aserfallassimaqalutillu sorpassuit sinerissatsinni aserfallassimasorpassuit assigalugit.

Uani upperisaq kisimi aallaavittut siunertaanngilaq, oqaluffiilli aserfallattaalineqarnerisiguttaaq takornariaqarnikkut oqaluttuarisaanitsinni atorluarneqarsinnaasutut ilaalluinnarmata, tassuunakkut qanoq takornariagassaarnikkut nunarsuarmioqatitta alakkassallugit pingaartilluinnartagaasa ilaat iliuuseqarfigisinnaagatsigit aningaasarsiutigilerlugillu, nunarsuarmioqatigut assigalugit.

Kristumiussutsimmi nunatsinnut eqqunneqareerneratali kingorna qanoq tamassumuuna atorluaanerusinnaanerput ullumikkumullu naleqqussarnerusinnaanermut pissusitoqaasunut innarliivallaanngikkaluarluta suliarisinnaagaluqaagut.

Nalunngilarpulli nassuerutigisariaqarlugulu, sineriatinni sorpassuit aserfallassimagaarmata akissaqarniarnikkut unammigassagut imaannaanneqaat.

Unalu unammilligassanut ilaalluinnarpoq, taamaattumillu Naalakkersuisutta nalunaarusiornerisigut aningaasanut inatsisissani tullinnguuttuni pingaarnersiusarnitsinni qanoq ikkunniarneqartarsinnaanissaat ujartueqatigiiffigisinnaallualissallutigu.

Aningaasatigut ingerlatsinikkullu pisortanut kingunerisassai:

Pilersaarummik sananissamut piffissaq atorneqartussaq ukiup ilivitsup iluaniissinnaanissaa naatsorsuutigineqassaaq.

AC-fuldmægtigellu ukiup ataatsip sulineratut naleqassalluni 500.000kr.

Namminersortunut aningaasarsiornikkut allaffissornikkullu kingunerisassai:

Soqanngilaq.

Innuttaasunut aningaasarsiornikkut allaffissornikkullu kingunerisassai:

Soqanngilaq